

ILANNGUSSAQ 3

Uunga nassuiaatit

Sulinngiffeqarallartarneq najuutinngikkallartarnerlu pillugit Inatsisartut inatsisaat kiisalu sinnisussamik aggersaasarneq pillugu

(Inatsisartut suleriaasiata allanngortinneqarnera pillugu siunnersuummut ilanngussaq 2)

§ 1-imut

Imm. 1 Inatsisartut Naalackersuisullu pillugit Inatsisartut inatsisaanni § 4, imm. 1-imik uteqqiineruvoq. Inatsisikkut aalajangersakkap taassuma inatsisitigut atugassaqartitsissutaa tassaavoq Inatsisartunut ilaasortatut atuuffimmit najuutinnginnissamut sulinnigiffeqarallarnissamullu aallaavittut piginnaatitaaffitsigut piumasaaqateqartoqarsinnaanngimmata, tamanna imm. 2-mi itisilivigineqarpoq. Aamma Inatsisartunut ilaasortap nammineerluni atuuffimminit tunuarsinnaaneranut § 4, imm. 1, akornusiuteqqasoq oqaatigineqarpoq, tassami alloriarneq taamaattoq aamma Inatsisartunit akuerineqassammat.

Pisussaaffittut innuttaasunut sullissisutut atuuffiunera Inatsisartut inatsisartoqarnikkut sulineranni il.il. kajumilluni peqataanissamut piareersimanissamut pisussaaffiliivoq, tassani aamma tamatumunnga Inatsisartunit ataatsimiititaliamilluunniit attuumassuteqartumit aggersagaanermi takkunnissamut, § 1-ip qulaani immikkoortumut qulequtaq takujuk.

Inatsisartut ataatsimiittarfianni ataatsimiinnernut tamarluinnarnut pinngitsoorani peqataasussaatitaanertut takkuttussaatitaaneq paasineqassanngilaq, imaluunniit ataatsimiititaliap ataatsimiinnerinut tamanut sammisaanulluunniit assingusunut, soorlu paasisassarsiorluni angalanernut isumasioqatigiinnernut il.il. Taamaalilluni Inatsisartunut ilaasortat ingerlaavartumik ataatsimiititaliaminnut partigruppeminnullu isumaqatigiissuteqarlutik sulinerminni pingaarnersiuisinnaanermut periarfissaat maannamut atorineqartoq sulii periarfissaassaaq. Taamaattorli Inatsisartut sammisaqarnerannut peqataanissaminnut Inatsisartunut ilaasortat piareersimassapput naammaginartumillu akulikissusilimmik taakkununnga peqataallutik.

Imm. 2-p Inatsisartutut atuuffimmit sulinnigiffeqarallarnissaap najuutinngikkallarnissallu najoqqutassiap taassuma malittarisassai malillugit akuersissutigineqartussaananeramik erseqqissaanermigut imm. 1 attuumassuteqalersippaa. Akuersissuteqarnermik nalunaaruteqarnissamut piginnaatitaaffik Inatsisartut Siulittaasoqarfianniippoq, taassuma § 10 malillugu malittarisassat allaffissornikkut ingerlanneqarnerisa ilaa Inatsisartut Allattoqarfiannut suliakkiutigisinnaavaa.

§ 2 malillugu najoqqutassiap sulinngiffeqarallartarnermut malittarisassartaasa illuatungaani aningaasarsiaqaatigalugu sulinngiffeqarallartarneq, illuatungaani §§-it 3-4 malillugit aningaasarsiaqaataannngitsumik sulinngiffeqarallartarneq immikkoortippai. §§-it 5-8 malillugit najuutinngikkallartarneq tamatigut aningaasarsiaqaataasumik akuersissutigineqartarpoq.

§ 2-mut

Pisut Inatsisartunut ilaasortap aningaasarsiaqaataasumik sulinngiffeqarallarnissamut akuerineqarfigisinnaasai § 2-mi aalajangersakkap taagorpai, § 12 takujuk.

Imm. 1 naparsimanermik pissuteqartumik, ilaasortap ullorsiutini ullut 14-it sinnerlugit atuuffimminik naammassinnaannnginneranik nassataqarnissaat ilimagineqartunut sulinngiffeqarallartarnermut tunngassuteqarpoq. §§-it 5-7 malillugit najuunnissamut akornusiuttoq ullut 14-it sinnerlugit sivisussuseqarnissaa ilimagineqarpat najuutinngikkallarnersaaq pisortatigoortumik akuerineqarnissamik qinnuteqaatigisariaqanngitsoq.

Peqqinnissakkut ajornartorsiutit, Inatsisartunut ilaasortap atuuffimminik naammassinninnissaanut akornusiuttut tamarmik taaguutip napparsimanerup ataaniipput. Tassaasinnaapput timikkut (somatic) tarnikkulluunniit napaatit, tassani aamma uippakajaarnermik nappaatit, taakku nakorsap naliliinera malillugu nakorsarneqartariaqarpat.

Tassunga atatillugu akornusiuttoq napparsimanermik pissuteqartoq ”pissutissaqavilluni najuutinnginnermik” taaneqartarpoq, tassa najuutinnginnissamut tunngavik unioqqutitsinngitsoq, kisiannili erseqqissaatigineqassaaq nappaatit tamavimmiunnngillat pissutissaqavissumik najuutinnginnissamut tunngavittut isigineqarsinnaasut. Nappaat ima ittuusariaqarpoq Inatsisartunut ilaasortap atuuffimminik naammassinninnissaanut akornusiuttuulluni. Tamatuma nassatarisaanik uippakajaarnerit annikitsut annikitsumilluunniit peqqiillortutut misigisimanerit ippigusuuteqarnerilluunniit namminnerminnik pissutissaqavilluni najuutinnginnermut tunngavigissallugit tulluannngillat. Taamaalillutik nappaatit najuutinnginnissamut pissutaasinnaasut pillugit nassuiaatigineqartut nalinginnaasumik sulineri atugassiissutinut tunngaviusunut akuerineqartunut naapertuupput, taakkunanilu periuserineqartoq qanoq paasinninnissamut nassuiaatit atorneqarsinnaavoq.

Tamatuma saniatigut § 6-imut innersuussisoqarpoq, napparsimanermik pissuteqartumik najuutinnginneq ullorsiutini ullut 14-it qaangiutereernerisigut ingerlaqqinnissaa ilimagineqarpat Inatsisartunut ilaasortap sulinngiffeqarallarnissamik qinnuteqartussaataitaneramik nassataqartumut.

Imm. 2 naartunermi, erninermi meeravissartaarnermilu sulinnigiffeqarallarnissamik periarfissamut attuumassuteqarpoq. Aningaasarsiaqartitaanermut inatsisip allannguutissaatut siunnersuummi § 2, imm 3-mi siunnersuutigineqartoq aalajangersakkap naammassivaa, aningaasarsiaqartitaanermut inatsimmi maannamut § 2, imm. 5 aamma § 6, imm. 11 malillugit naartunerup, erninerup meeravissartaarnerullu pissutissaqavilluni najuussinnaannginnertut nalilerneqarnissaa inatsimmut nassuiaatit malillugit erseqqissumik piumasaqaataavoq.

Tassunga tunngatillugu itisiliivigineqarsinnaavoq naartuneq il.il. nappaataannginnerat taamaattorli suliffeqarnermi pisinnaatitaaffinnut il.il. tunngatillugu pissutissaqavilluni najuussinnaannginnertut isigineqarmata. Taamaattorli naartuneq erninerlu piffissanik mianersuunneqarfiusariaqartunik nassataqartarnerat akuersaarneqarpoq, pissutissaqavillunilu najuussinnaannginnermik tassungaluunniit assersuunneqarsinnaasumik nassataqartarlutik. Tamanna taamaallaat erninermut piffissamullu erniliiviffiusumut atuutinngilaq, tassami ullutsinni aamma erninerup meeravissartaarnerullu kingorna piffissani aalajangersimasuni meeqqap angajoqqaallu imminnut atassuteqalernissaat pilersinniarlugu pisariaqartitsisoqartarnera akuersaarneqarmat.

Sulinnigiffeqarallartarnerit pineqartut qinnuteqarnikkut akuersissutigineqartarput, piffissalli akuersissutigineqartut piffissanit Namminersorlutik Oqartussani tjenestemandit taamatut atugaqartut pisinnaatitaaffigisassannit sivilunerussanngillat. § 1-imulli nassuiaatit malillugit Inatsisartunut ilaasortat, tjenestemanditut sulisutullu allatut pinnatik, naartunermut, erninermut meeravissartaarnermullu atatillugu piffissami aalajangersimasumi sulinnigiffeqarallarnissamut piginnaatitaaffeqarnissaminnut piumasaqaateqarsinnaanngillat.

Malittarisassat assingusut maannamut atuuttut naapertorlugit, naartunermi, erninermi meeravissartaarnermilu sulinnigiffeqarallartarnermut malittarisassat assigiissaakkat atorlugit, tjenestemandinullu malittarisassat atuuttut maleruarlugit, maannamut Inatsisartut periuseqarput. Siunissami aamma taamaannissaa ilimagineqarpoq. Pisunili immikkut ittuni Inatsisartut Siulittaasoqarfiata periuseq taanna sukateriffigissallugu toqqarsinnaavaa, assersuutigalugu pisumi ajornartorsiorfiusumi Inatsisartunut ilaasortat najuunnissaat ima piumasaqaataatigisoq nalilerneqarpat allaat ilaasortap erninermut atatillugu sapinngisamik siusinnerpaakkut sulinnigiffeqarallalernissaa tunuartinneqartariaqarluni.

Imm. 3 qanigisap toqukkut qimagunnerani perulunnartumilluunniit napparsimanerani sulinnigiffeqarallartarnermut tunngassuteqarpoq. Aningaasarsiaqartitaanermut inatsisip allannguutissaatut siunnersuummi § 2, imm 3-mi siunnersuutigineqartoq aalajangersakkap naammassivaa, aningaasarsiaqartitaanermut inatsimmi maannamut § 2, imm. 4 aamma § 6, imm. 10 malillugit qanigisap toqukkut qimagunnerani perulunnartumilluunniit napparsimanerani najuutinnginneq pissutissaqavilluni najuussinnaannginnertut nalilerneqarnissaa inatsimmut nassuiaatit malillugit erseqqissumik piumasaqaataavoq. Tassunga atatillugu itisiliivigineqarsinnaavoq qanigisap toqukkut qimagunnerani,

perulunnartumilluunniit napparsimanerani najuutinnginneq suliffeqarnikkut pisinnaatitaaffinnut il.il. tunngatillugu pissutissaqavilluni najuutinnginnertut isigineqannginnera. Taamaattorli pisuni taamaattuni ilaqutariinnikkut tunngassuteqartunik aallussinissap piffissani aalajangersimasuni pisariaqartarnera suliffeqarnikkut pisinnaatitaaffinnut malittarisassani akuerisaavoq.

Sulinngiffeqarallarnerit pineqartut qinnuteqarnikkut akuersissutigineqartarput, piffissalli akuersissutigineqartut piffissanit Namminersorlutik Oqartussani tjenestemandit taamatut atugaqartut pisinnaatitaaffigisassannit sivisunerussanngillat. § 1-imulli nassuiaatit malillugit Inatsisartunut ilaasortat, tjenestemanditut sulisutullu allatut pinnatik, qanigisap toqunerani perulunnartumilluunniit napparsimanerani piffissami aalajangersimasumi sulinngiffeqarallarnissaminnut pisinnaatitaaffeqarnissamut piumasaqaateqarsinnaanngillat.

Malittarisassat assingusut maannamut atuuttut naapertorlugit, qanigisap toqunerani perulunnartumilluunniit napparsimanerani sulinngiffeqarallartarnermut malittarisassat assigiissaakkamik, tjenestemandinullu malittarisassat atuuttut maleruarlugit, maannamut Inatsisartut periuseqarput. Siunissami aamma taamaannissaa ilimagineqarpoq. Pisunili immikkut ittuni Inatsisartut Siulittaasoqarfiata periuseq taanna sukateriffigissallugu qinersinnaavaa, assersuutigalugu pisumi ajornartorsiorfiusumi Inatsisartunut ilaasortat najuunnissaat ima pisariaqartigisoq nalilerneqarpat allaat ilaasortap ilaqutariinnikkut tunngassuteqartunik annerpaamik akuerineqarsinnaasumik aallussinissaa tunuartinneqartariaqarluni.

Aningaasarsiaqartitaaneq il.il. pillugu inatsisip allannguutissaatut siunnersuummi § 4, imm 5-imi siunnersuutigineqartoq, sammisami maannamut malittarisassanik periutsnillu ingerlatseqqittoq imm. 4-p naammassivaa.

Imm. 1 pisulluunniit imm. 2-mi 3-milu taaneqartut malillugit napparsimanermik pissuteqartumik najuussinnaannginnermut uppersaammik Inatsisartunut ilaasortamit piumasaqaateqarsinnaanermut imm. 5-ip Inatsisartut Siulittaasoqarfiat periarfissippaa. Uppersaatait kingusinnerusukkut aatsaat saqqummiunneqarsinnaasut, soorlu qanigisap toqunerani toqusup allagartaata saqqummiunneqarnissaa sulinngiffeqarallarnerup qaangiunnerani piumasaqaatigineqarsinnaavoq.

§ 3-mut

Qinikkatut atuuffinnik aalajangersimasunik aallussinissamut sulinngiffeqarallarnissamut akuersisoqarsinnaaneranut imm. 1 periarfissiivoq, tamanna ingammik borgmesteritut, viceborgmesteritut Kalaallit Nunaanni kommunalbestyrelsinut ilaasortatut, Naalakkersuisunut ilaasortatut Folketingimulluunniit ilaasortatut. Periarfissat tamakkerlutik taaneqarput, taamaammallu assersuutigalugu Savalimmiuni Lagtingimut Danmarkimiluunniit

kommunalbestyrelsimut ilaasortanngornissamut il.il. aalajangersagaq atorneqarsinnaanngilaq. Atuuffinnik allanik taamaattunik aallussiniarnermi § 4 malillugu sulinngiffeqarallarnissamut qinnuteqartoqarsinnaavoq immaqalu tamanna pisariaqassappat Inatsisartunut ilaasortaq atuuffimminit tunuavittariaqarsinnaavoq.

Naalackersuisunut ilaasortatut atuuffimmut tunngatillugu, sulinngiffeqarallarnissamut periarfissaq aningaasarsiaqartitaanermut inatsimmi § 2, imm. 3-mi oqaaseqatigiit aappaanni taaneqareerpoq. Aalajangersakkap atuuffinnut allanut tunngatillugu periuseq atuuttoq taperserpaa.

Aalajangersagaq ”sinnaavoq” atorlugu oqaasertalerlugu aalajangersarneqarmat, atuuffinnik taaneqartunik aallussinissamut sulinngiffeqarallarnissamut akuerineqarnissamut piunasaqaateqarnissaq tunngaviatigut ajornarpoq. Taamaattorli pisuni nalaanneqartuni sulinngiffeqarallarnissamut akuersissuteqartarneq aalajangersimasumik periusiuvoq. Imm. 2 aamma 3 malillugit aningaasarsiaqaataanngitsumik sulinngiffeqarallarnissamut akuersisoqartarpoq.

Aaqqissuussaq maannamut atuuttoq imm. 2-p malippaa, taanna malillugu Inatsisartunut ilaasortaq aningaasarsiaqaataasumik naalackersuinikkut atuuffimmik allamik aallussiniarluni sulinngiffeqarallarnissamut akuerineqartoq, atatillugu aningaasarsiaqaatigalugu Inatsisartunut ilaasortatut atuuffimminit sulinngiffeqarallarnikkut aningaasaqarnikkut iluaquserneqarsinnaanngilaq. Taamaammat sulinngiffeqarallarnernerup nalaani aningaasarsianik aningaasartuuteqarnermulluunniit tapisianik katersaqartoqarsinnaanngilaq aamma soraarnerussutisiassanik ilaasortaajunnaarneruutinilluunniit katersaqarsinnaanngilaq. Aningaasarsiaqartitaanermut il.il. inatsisissamut siunnersuummi § 2, imm. 5-imut siunnersuutip imaa takujuk.

§ 4-mut

§ 1 malillugu ”pisuni immikkorluinnaq ittuni” Inatsisartunut ilaasortatut atuuffimmit sulinngiffeqarallarnissamut akuersisinnaanermut aalajangersagaq periarfissii voq, tassa pisuni qaqutigoorluinnartuni sukumiisumik nalilersuinermi Inatsisartunut ilaasortat ataatsimeeqataasussaataitanerannut pisussaaffittullu innuttaasunut sullissilluni atuuffiuneranut tulluartsuutut nalilerneqarpat. Sulinngiffeqarallarnissamut qinnuteqaammut tunuliaqutaq ilaasortap ingerlatamik nukingernarluinnartumik assingusumilluunniit aallussiniarnera pisariaqarluinnartuussaaq.

Inatsisartut Siulittaasoqarfiata aalajangersagaq taanna malillugu sulinngiffeqarallarnissamut akuersissuteqarsinnaanermut periarfissaa sakkortuumik killilersugaavoq, Tassami Inatsisartunut ilaasortaanerup inatsisikkut aalajangikkamik avaqunneqarsinnaanngitsumik pisussaaffigalugu innuttaasunik sullissilluni atuuffiunera Siulittaasoqarfiup ataqqissagamiuk.

Taamaammat Inatsisartunut ilaasortap Inatsisartunut ilaasortatut atuuffimminut naleqqiullugu sulinnigiffeqarallarnissamut tunngaviusinnaasutut §§-it 2-mi 3-milu taaneqartut avaqqullugit allamik aallussaqaarnissani pingaartinneruguniuk Inatsisartunut ilaasortaanerminut tunuarnissamik qinnuteqarnissaa, tassa Inatsisartunit ataavartumik tunuarnissaa erseqqilluinnartumik pingaarnertut malittarisassaavoq.

Taamaattorli atatillugu Inatsisartunut ilaasortap missingiineq aalajangersimasoq malillugu Inatsisartunut ilaasortatut atuuffimminut suliassaminik nukingernartumik aallussiniarluni piffissami killilimmi sulinnigiffeqarallarnissamut akuerineqartarnera Inatsisartut periusianni akuerisaavoq. Aalajangersagaq taanna malillugu sulinnigiffeqarallarnissamut akuerineqarnissamut piumasaqaateqartoqarsinnaanngilaq, imm. 3 malillugu taamak pisoqartillugu aningaasarsiaqaataanngitsumik il.il. sulinnigiffeqarallarnissamut akuersisoqartarpoq. Imm. 2 malillugu sulinnigiffeqarallarnissaq akuerineqarpat sinniisussap aggersarneranut aningaasartuutaasinnaasunik ilaasortap matussusiinissaa Siulittaasoqarfiup nalinginnaasumik piumasaqaatigisarpaa.

Inatsimmi allassimaneratut sulinnigiffeqarallarnissaq aalajangersagaq taanna malillugu akuersissutigineqarsinnaassappat periarfissaq pingaarnerpaaq tassaavoq ilaasortap namminersorluni ingerlatamini suliassamik nukingernartumik suliaqarnissaata avaqqunneqarsinnaanngitsumik pingaaruteqarnera. Taaguut ”namminersorluni ingerlata” tassaavoq; namminerisamik aningaasaqarnikkut ingerlatat tassani aamma suliffeqarfimmik piginnittut imaluunniit siulersuisunut siulittaasutut il.il. Namminersorluni ingerlatanut taamaattunut atatillugu immikkut ittunik tassanngaannartunik pisoqarsinnaavoq nammineerluni najuunnissamik pisariaqalersitsisunik, soorlu akiliisinnaajunnaarnissamik pisinnaasumik pinaveersaartitsiniarluni, ikuallattornerup ajunaarnersuaqarnerataluunniit kingunerani misissuilluni imaluunniit ingerlataq tuniniarlugu inuttut isumaqatigiinniuteqarluni il.il. Akerlianik ingerlatap ulluinnarni ingerlanneqarneranut nammineerluni najuunnissamut pisariaqartitsineq tunngassuteqarpat, assersuutigalugu isertitat appariarnerannik imaluunniit piffissami sulisussaaleqisoqarneranik patsiseqarpat sulinnigiffeqarallarnissamut akuersisoqarsinnaanngilaq.

Tamatuma saniatigut suliassanik nukingernartunik allanik pisariaqarluinnartunik namminersorluni ingerlatanut tunngassuteqanngitsunik aallutaqarniarluni sulinnigiffeqarallarnissamut akuersisoqarsinnaaneranut imm. 1 periarfissiivoq. Namminersorlunili suliassat najuutinnginnissamik pisariaqarluinnalersitsisut ullunit 14-init sivisunerusumik najuutinnginnissamik nassataqartannginnissaat pingaarnarpaatut malittarineqassaaq, taamak pisoqarnerani nujuutinngikkallarnissamut akuersissummik Siulittaasoqarfimmut § 8-mi malittarisassaq malillugu qinnuteqartoqarsinnaavoq.

Qanigisap toqunerani perulunnartumilluunniit naparsimanerani sulinngiffeqarallarnissamut malittarisassaq taanna malillugu qinnuteqartoqarsinnaangilaq, taarsiullugu § 2, imm. 3 takujuk.

Qanorluunniit taakku nukingernartigigaluarpata, Inatsisartut avataatigut naalackersuinikkut suliat nalinginnaasumik sulinngiffeqarallarnissamut akuersinissamut tungaviusinnaangillat, tassami taakku ”pisariaqarluinnartutut” nalilerneqarsinnaanerit qularnarmat. Inatsisartunut ilaasortatut atuuffiup avataatigut nunat tamalaat akornanni naalackersuinikkut ataatsimiinnertut peqataanermut tunngatillugu § 8-mut nassuiaatinut innersuussisoqarpoq.

Imm. 1 malillugu sulinngiffeqarallarnissamut akuersissuteqarnissamut sinniisussamik aggersaanermi aningaasartuutit Inatsisartunut ilaasortap akiliuteqarnissaa piunasaqaatigineqarsinnaasoq imm. 2-p aalajangerpaa. § 13-i malillugu namminerisamik siunniussamik aallussiniarneq tassani pineqarmat pisortallu aningaasaqarnerannik nammakkiisussaanginnera tamatumani tunngavigineqarpoq, § 3-lu malillugu naalackersuinikkut sunniutilimmik siunertaqanginnera. Aningaasarsiaqartitaanermut inatsisip allannguutissaanut siunnersuummi § 2, imm. 4 aalajangersakkap naammassivaa.

Aningaasartuutit aalajangersagaq taanna malillugu matussuserneqarnissaat piunasaqaatigineqarsinnaasut tassaapput angalanermut najugaqarallarnermullu aningaasartuutit, sinniisussanut sinniisutut atuuffimminnik naammassinninniarlutik Nuummukartussanut tassanilu najugaqarallartussanut atorineqartussat. Sinniisussat aningaasarsiaasa matussuserneqarnissaat pisariaqangilaq, tassami § 12, malillugu aningaasartuutit taakku ilaasortamut sulinngiffeqarallarnissamik akuerineqartumut sipaarutaasunit matussuserneqassammata.

Aningaasarsiaqartitaanermut il.il. inatsisissatut siunnersuummi § 2, imm. 4-amut siunnersuutip imarisaa imm. 3-p uterpaa, tamanna paasiuminarsaanissaq eqqarsaatigalugu.

§ 5-imut

Inatsisartunut ilaasortat atuuffimminnik naammassinninnissamuk akornuserneqarallartut nalunaartussaataitaanerannut aalajangersagaq attuumassuteqarpoq. Najuutinngikkallarnermut pissutaasinnaasut §§-init 6-mit 8-millu malittarisassiorneqarput.

Imm. 1 malillugu Inatsisartunut ilaasortaq najuunnissaminut akornuserneqartoq il.il. erngerluni tamanna pillugu Inatsisartut Siulittaasoqarfiannut nalunaaruteqassaaq. ”Erngerluni” isumaqarpoq ilaasortap ataatsimeeqataasussaataitaanerminut akornuserneqarnera paasinarsippat imaluunniit ilimanarsilluinnarpat ingerlaannaq nalunaarut tunniunneqassaaq. Ataatsimeeqataasussaataitaanerup annertussusaa pillugu § 1-imut nassuiaatinut innersuussisoqarpoq.

Akornuserneqarnerup qanoq sivisutiginiissaa ilimagineqarnersoq atatillugu nalunaarutigineqassaaq, tamanna ilaasortap missingiorsinnaappagu paasissutissanilluunniit allanik tamatumunnga tunngasunik tunniussisinnaappat.

Ilaasortap akornuserneqartup imm. 2 malillugu akornuserneqarnerup qanoq sivisutiginiissaa ilimagineqarnersoq qaqugulu qaangiunnissaa pillugit paasissutissanik pingaarutilinnik Inatsisartut Siulittaasoqarfiat ingerlaavartumik nalunaarfigisassavaa. Tamanna pillugu paasissutissanik nutaanik saqqummertoqanngippat taava akornuserneqarnerup ilimagisatut sivisussuseqarunnaarnera pillugu ilaasortap nalunaarnissaa ilimagineqassaaq. Qanoq nutaarsiassaqaarnera pillugu Siulittaasoqarfiup apeqqutigisinnaasaanut ilaasortap akissuteqarnissaa tamatuma saniatigut ilimagineqassaaq.

Naak akornuserneqarneq allannguuteqanngikkaluartoq Siulittaasoqarfilluunniit saaffiginninngikkaluartoq kingullermik nalunaaruteqarnermiit ullut 14-it qaangiutinnginnerini akornuserneqarnerup killiffia pillugu Siulittaasoqarfimmut paasissutissiilluni nalunaaruteqartassaaq.

§ 6-imut

Nammineq napparsimanermut aalajangersagaq attuumassuteqarpoq, ilaasortap atuuffimminik naammassinnissinnaaneranut akornusiussinnaasuni pingaarnerpaajusoq. Napparsimaneq aatsaat Inatsisartunut ilaasortatut atuuffimmik naammassinnissinnaaneranut akornusiukkuni najuutinnginnissamut tunngaviusinnaavoq. Erseqqinnerusumik paasisaqarniaraanni § 2-mut nassuiaatinut innersuussisoqarpoq.

Aalajangersagaq taanna malillugu napparsimanermut tunngatillugu, pissutaasinnaasutut allatut pinani, napparsimanermik pissuteqartumik najuunnissamut akornuserneqarneq ullut 14-it sinnerlugit sivisussuseqarnissaa paasinarsippat sulinngiffeqarallarnissamut § 2, imm. 1 malillugu ilaasortap qinnuteqarnissaa pimasqaataavoq. Napparsimanerunngitsunut pissutaasinnaasunut allanut tunngatillugu akornuserneqarnerup qanoq sivisutiginiissaa pillugu siumungaatsiaq nalilersuinissaq nalinginnaasumik periarfissaqarneq ajorpoq.

§ 7-imut

Aalajangersakkap nassatarisaanik napparsimanermi najuunnissamullu pissutissaqavissumik akornuserneqarnermi, tamanna pillugu § 5, malillugu piffissaagallartillugu nalunaartoqarsimappat ingerlaavartumillu paasissutissiisoqartarpat il.il § 1, imm. 2 malillugu najuutinnginnerup akuerineqartutut isigineqarnera ilaasortap naatsorsuutigisinnaavaa. Taamaattorli najuutinnginnermut pissutaasoq naammattutut nalilerneqanngippat Inatsisartut Siulittaasoqarfiat allatut nalunaarsinnaavoq. Tamatumunnga assersuutaasinnaavoq

timmisartukkut angallannermi aqutip aalajangersimasup aallarnissanut pilersaarutai takkunnissamut akornutaanngitsutut Siulittaasoqarfiup nalilerpagu, allakkut aqutissaqartoq malugineqarpat assersuutigalugu umiarsuakkut.

Inatsisartunut ilaasortamut imm. 1-imi taaneqartutut ittumik akornusiuttoqarneranut uppersaammik imm. 2 malillugu Siulittaasoqarfik piumasaqarsinnaavoq, Taassuma ataani assersuutigalugu aamma napparsimanermut tunngatillugu nakorsamit napparsimanermut uppersaat.

§ 8-mut

Aalajangersakkap nassataaa napparsimanerit pissuteqavissumillu akornuserneqarnerit § 7-imi taaneqartut saniatigut immikkut pisuni aatsaat najuutinngikkallarnissamut akuersisoqarsinnaanera. Najuutinngikkallarnissamut taamaattumut aatsaat sukumiisumik nalilersuereernermi Inatsisartunut ilaasortat ataatsimeeqataasussaatitaanerannut § 1, § 4, imm. 1-ilu malillugit pisussaaffigalugu innuttaasunut sullisilluni atuuffiuneranut tulluartut nalilerneqarpat Siulittaasoqarfik akuersisinnaavoq.

Najuutinnginnissaq aalajangersagaq taanna malillugu akuersissutigineqarsinnaassappat, akornusiuttup Inatsisartunut ilaasortap napparsimaneranut pissuteqavissumilluunniit najuussinnaannginneranut assersuunneqarsinnaanissaa piumasaqaataavoq. Piumasaqaat taanna naammassineqarsinnaavoq assersuutigalugu pisuussutiginnisamik iluatsitsinerliorluni nalaatsornikkut ilaasortap timmisartoq ilaaffissani inortorsimappagu. Pisut allat tassaasinnaapput piffissaagallartillugu kalerrinneqanngitsoorneq, allamik isumalluutissaqarani meeqqamut nukangasumut angajoqqaatut suliassaqaalerneq. Angajoqqaatut suliassat allat nalinginnaasut, soorlu atuarfimmu atassuteqarneq meeqqalluunniit angajoqqaaminnik pisariaqartitsinerat, paaqqutarinninneq tuppallersaanerlu najuutinnginnissamut akuerineqarnissamut tunngaviusinnaanngillat.

Naalackersuinermik suliat allat Inatsisartunut ilaasortatut atuuffimmu attuumassuteqanngitsut nalinginnaasumik najuutinnginnissamut akuerineqarnissamut § 8 malillugu tunngaviusinnaanngillat. Taamaattorli Siulittaasoqarfiup maannamut periusiani tamatuminnga saneqqussinerit tassaasinnaapput nunat tamalaat akornanni naalackersuinikkut ataatsimiinnerit sivikitsumik ingerlanneqartut aqqissuussallu allat:

Inatsisatunit pisortatigoortumik aallartitatut ilaasortaq ataatsimiinnermut il.il. peqataaguni, tamatumunngalu Inatsisartunit toqqagaalluni, taava ataatsimiinnermut peqataaneq Inatsisartunut ilaasortatut atuuffimmu pilersaarutaasumik ilaavoq.

Ilaasortalli namminersuutigalugu partiiniluunniit tunuliaqutaralugu nunat tamalaat akornanni ataatsimiinnermut aqqissuussamulluunniit allamut peqataanissani kissaatigippagu,

oqalliffimmi pineqartumi qaffasissumik inissisimasumik peqataasoqarnera Kalaallit Nunaata soqutigisaanut isigineqarneranullu iluaqutaasutut Inatsisartut Siulittaasoqarfiata nalilerpagu, saneqqussilluni najuutinnginneq akuersissutigineqarsinnaavoq. Sulinnigiffeqarallernerli piffissami sivikinnerusumi taamaallaat akuersissutigineqarsinnaavoq, tamanna Inatsisartut sulinerannut tulluartaasutut nalilerneqarpat.

Aalajangersagaq taanna malillugu najutinnginnissamut akuerineqarnissamut piumasaqaateqartoqarsinnaangilaq, kiisalu akuersinnermut atatillugu najuutinnginnerup tunngavia pillugu uppersaammik saqqummiussisoqarnissaanik Inatsisartut Siulittaasoqarfiat piumasaqarsinnaavoq.

§ 8 malillugu akuersissut oqaaseqatigiit aappaanni aalajangersagaq malillugu siumungaaq nalunaarutigineqarsinnaavoq, tassa najuutinnginnissamut sioqqutsilluni qinnuteqartoqassaaq, imaluunniit najuutinnginnissamut tunngaviusup saqqummernerani erngeruimik. Soorunami akuersissutigineqanngitsumik najuutinnginneq kingornatigut tunumoortumik akuersissutigineqarsinnaangilaq.

Akuersissutigineqanngitsumik najuutinnginneq § 13 malillugu aningaasarsianit ilanngaassiffigineqarnermik nassataqassaaq, Inatsisartullu najuutinnginnermut nalunaarsuiffianut § 11 malillugu saqqummiunneqarluni.

§ 9-mut

Najuutinnginnissamut sulinnigiffeqarallarnissamullu nalunaarnernut qinnuteqaatinullu tamanut aalajangersagaq attuumassuteqarpoq, assersuutigalugit § 7 malillugu najuutinnginnissamut nalunaarutit, § 8 malillugu najuutinnginnissamut qinnuteqaatit, najuutinnginnerup killiffia pillugu nalunaarutit kiisalu najuutinnginnermi tunngavigineqartut suuneri suusimaneriluunniit pillugit uppersaatinik tunniussinerit, il.il. Aamma § 2, imm. 4 malillugu akiliunneqarluni angalanermi aningaasartuuteqarnermut tapisiaqartitaanissamut qinnuteqaatit § 15-ilu malillugu ilaqtanik ingiallorteqartarnek aamma ilanngunneqarpoq.

Saaffiginnissutinut taamaattunut qanoq ilusiliinissamut kingusinnerpaamillu tunniussivissamut killiliinissamut Inatsisartut Siulittaasoqarfiat aalajangersaasinnaavoq, tassani assersuutigalugu aamma sulinnigiffeqarallarnissamut qinnuteqaatit allaganngorlugit, qarasaasiakkut imaluunniit immersukkamik nittartakkamut aalajangersimasumut mailikkulluunniit tunniunneqartarnissaannut. Qanoq ilusiliinissamut kingusinnerpaamilluunniit tunniussivissamut eqquutsitsinngitsoornerit saaffiginnissutip tiguneqarsimannginneratut nalilerneqarneranik imaluunniit kissaatigisaq naapertorlugu akuerineqannginneranik nassataqarsinnaapput.

§ 10-mut

Aalajangersakkap sulinniffeqarallarnissamut najuutinngikkallarnissamullu akuersissuteqarnermi aalajangernerit aalajangersimasut Inatsisartut Allattoqarfiannut isumagisassanngortillugit Inatsisartut Siulittaasoqarfiat aalajangersinnaatippaa, taamaalilluni akuersissuteqartarnermut atatillugu assigiiaaginnartunik isummerfigisariaqanngitsunillu Siulittaasoqarfik nammakkerneqassanngilaq. Aningaasartuutitut matussusiisarnermut akuersissutitut il.il aamma tamanna atuuppoq, § 2, imm. 4 aamma § 15 takukkit.

Suliassat agguataarneqarnerat aalajangersagat taanna malillugu imaappoq Inatsisartut Allattoqarfiata akuersissuteqarnermik suliat nalornissutissartaqanngitsut kisiisa isummerfigisinnaavai. Suliat taamaattut Siulittaasoqarfiup ilitsersuutai periusialu malillugit aalajangiiffigineqarsinnaapput, tassani aamma atugassarititaasut pillugit uppersaateqarnissamullu piumasaqaatit.

Suliat nalorninaatsillit Inatsisartut Siulittaasoqarfiannut saqqummiunneqartussat tassaapput suliat aalajangersimasumik periuseqarfigineqanngitsut Siulittaasoqarfimmiilluunniit ilitsersuiffigineqanngitsut, ilaatigullu suliat tatiginartumik uppersaataitaqannginnamik qularnaatillit, naak Siulittaasoqarfiup tamakku saqqummiunneqarnissaat nalinginnaasumik ilimagisariaqaraa.

Inatsisartunut ilaasortap kissaatigisaq malillugu akuersissummik nalunaarfigineqanngitsup suliap Inatsisartut Siulittaasoqarfiannut nutaamik naliliiffigisassanngorlugu saqqummiuteqqinneqarnissaanut qaqugukkulluunniit piumasaqarsinnaanera imm. 2-mi aalajangersakkap isumannarpaa. Taamaattoqarnerani taannalu periutsimut aalajangersimasumut ilitsersuummullu allattoqarfimmut tunniunneqarsimasumut naapertuutinngippat Inatsisartut Siulittaasoqarfiata aalajangernerimik allannguiniarnerluni isumaliutigissavaa. Akerlianik sooq kissaatigisaq malillugu akuersisoqarsinnaasimanninnera pillugu naammattumik pitsaassusilimmik ilaasortaq nassuiaanneqarsimanersoq Siulittaasoqarfiup misissussavaa.

§ 11-mut

Pissutissaqavissumik akornuserneqarallarnermik sulinniffeqarallarnermik il.il. pissuteqartumik ilaasortat qanoq annertutigisumik atuuffimminnit najuussimanninnerat pillugu innuttaasunut paasisutissiissallutik aalajangersakkamik Inatsisartut imminnut pisussaaffilerput. Taamaalillutik qinikkat naalakkersuinerimik suliaqartut Inatsisartunut ilaasortat § 1 malillugu qanoq annertutigisumik ataatsimeeqataasussaatitaanerminnut naammassinnissimanerat pillugu paasitinneqarnissaminnut innuttaasut isumannaarinnissunneqassapput.

Paasissutissat Inatsisartut ukiumoortumik nalunaarutaanni kisitsisinngorlugit saqqummiunneqassapput. Najoqqutassiaq una malillugu Inatsisartunut ilaasortat ataasiakkaat sulinnigiffeqarallarnerinut najuutinnginnerinullu pissutaasimasut aallaavigalugit immikkoortiterlugit paasissutissat saqqummiunneqarnissaat ilimagineqarpoq. Taamaattorlu saqqummiussinermi tamatuma saniatigut ilaasortat ataasiakkaat suliffiup avataatigut inuuneri qulaarneqassanngillat, aamma sulinnigiffeqarallarnissamut qinnuteqaatit ataasiakkaat, ilaqutariinnikkut ilaasortallu ataasiakkaat namminersorlutik ingerlataannut tunngassuteqartunik imaqarsinnaasut, tamanut saqqummiunneqarnissaat nalinginnaasumik inertequtaassaaq. Taarsiullugu ilaasortat ataasiakkaat ullunik qanoq amerlatigisunik sulinnigiffeqarallarsimanerinut najuussimannginnerinulluunniit paasissutissat saqqummiunneqassapput, assersuutigalugu § 2, imm. 3 malillugu qanigisamik toqusoorsimanerit perulunnartumillu napparsimasoorsimanerit.

§ 12-imut

Aalajangersakkap Inatsisartunut ilaasortaq aatsaat § 2 malillugu sulinnigiffeqarnissaminut akuerineqarsimaguni aningaasarsiaqarsinnaasoq aningaasartuuteqarnermullu tapisiaqarsinnaasoq aalajangerpaa (napparsimaneq, naartuneq, ernineq, meeravissiartaarneq kiisalu qanigisap toqunerani perulunnartumilluunniit napparsimanerani).

Akerlianik §§-it 3 aamma 4 malillugit sulinnigiffeqarallarnermi aningaasarsiaqartoqarneq ajorpoq aningaasartuuteqarnermullu tapisiaqartoqartarani, tamaanga aamma § 3, imm. 2 aamma § 4, imm. 3 tamatuma saniatigut soraarnerussutisiaqalernissamut katersaqarnermut tunngassutilik, kiisalu § 3, imm. 3 ilaasortaajunnaarnersiutinut katersaqartarnermut tunngasoq.

§ 13-imut

Aalajangersakkap Inatsisartunut ilaasortaq aatsaat § 7 malillugu najuutinngikkallarnissamut akuerineqaruni aningaasarsiaqassasoq aningaasartuuteqarnerminullu tapisiaqartitaassasoq aalajangerpaa (napparsimaneq atuuffimmi najuunnissamut pissuteqavissumik akornuserneqarneq) imaluunniit § 8 (pisut napparsimanermit najuunnissamulluunniit pissutissaqavilluni akornuserneqarnermut sanilliunneqarsinnaasut).

Akerlianik piffissami akuerineqanngitsumik najuutinnginnerup nalaani aningaasarsiaqartoqarneq ajorpoq aningaasartuteqarnermullu tapisiaqartoqarneq ajorluni. Piffissami tassani ullormiit ullormut aningaasarsiassanit ilanngaassisoqartarpoq.

§ 14-imut

Imm. 1-ip nassataraa sulinnigiffeqarallartoqarnerata najuutinngikkallartoqarneratalu nalaani partii katusseqatigiilluunniit pineqartup ilaasortaaffigisaa sinniisussamik aggersaanissamut qinnuteqarnissaata pisariaqarnera.

Sinniisussamik aggersaanissamut qinnuteqaatip akuerineqarsinnaaneranut aalajangernerminut atatillugu Siulittaasoqarfiup najuutinnginnerup qanoq sivikitsiginissaa sivistiginissaaluunniit nalilersussavaa. Taamaalilluni soorlu maannamut periuseq taamaattoq, sinniisussamik aggersaasoqassappat najuutinngikkallarnerup ullorsiutini ullut 14-it sinnerlugit sivistussuseqarnissaa pisariaqarpoq. Periuseq taamaattoq ilaatigut partiinut partigruppinullu mikinernut iluarnaviangilaq, ingammik partiimut ataatsimik ilaasortaataqartumut taamaattummi ilaasortaataa najuussinnaanngippat sinniisussamillu aggersaanissamut akuersisoqanngippat partii sulisinnaajunnaassagami.

Maannamut periuseq atorpeqartoq imm. 2-p ingerlateqqippaa, taanna malillugu Inatsisartunut ilaasortamut toqukkut qimaguttumut, nammineersinnaassusiiagaasumut Inatsisartunilluunniit tunuarnissamik qinnuteqaanneqartumut sinniisussamik aggersaanissaq Inatsisartut Siulittaasuata namminersuutigalugu isumagissavaa. Inatsisartunut ilaasortap qinigaasinnaassusiiagaanissaa Inatsisartunit aalajangiunneqarpat aamma tamanna atuuppoq. Malittarisassat taakku assingi maannamut suleriaatsip § 58, imm. 1-ani aalajangersagaapput.

Pisoq taaneqartoq katersuunnerup avataatigut pippat, sinniisussaq aatsaat katersuunnerup tulliup aallartinnerani atuutilersumik aggersarneqassaaq.

Oqaaseqatigiit pingajuisa aalajangersarpaat piffissami sinniisup qinigaasinnaassusia Inatsisartunit akuersissutigineqarpat taava taanna Inatsisartunut ilaasortatut isigineqalissaaq. Piffissami tassani sinniisup taarsigaa ilaasortatut atuuffimminit ingerlatsisinnaajunnaassaaq, taamaalilluni Inatsisartunut ilaasortat amerlassusaat allanngortinneqassanngilaq. najuutinngikkallarnerup sulinnigiffeqarallarnerulluunniit naanerani §16-i malillugu aamma taamak pisoqassaaq.

Sinniisussap qinigaasinnaassusia maannakkutut Qinigaanerup Misilinneqarnisaanut Ataatsimiititaliamit suleriaatsimi § 7, imm.1, oqaaseqatigiit aappaat malillugu misissorpeqassaaq, tamatuma kingorna ataatsimiititaliaq inassuteqaammik Inatsisartunut saqqummiussissaaq. Maannamut malittarisassanut naleqqiullugu periuseq taanna

allannguuteqanngilaq, maannamut suleriaatsimi § 58, imm. 2 oqaaseqatigiit aappaat takujuk.

§ 15-imut

Sinniisussat aggersagaasut ilaqtanik ingiallorteqartarnerinut aningaasartuutitut malittarisassiani aalajangersakkat Inatsisartut inatsisaanni nr. 22-mi 18. december 2003-meersumi (aningaasarsiaqartitaanermut inatsit) kingullermik 2011-mi allannguuteqartinneqartumi § 5-imiipput.

Aalajangersakkap taassuma sulinngiffeqarallartarnermut malittarisassianut ilanngunneqarneratigut Siulittaasoqarfik periarfissinneqarpoq § 10 malillugu angalanermi ilaqtanik ingiallorteqarsinnaanermut Inatsisartut Allattoqarfiat akuersissuteqarsinnaalersillugu, tamanna nalunaarutip qinnuteqaatillu qularinissaanut tunngavissaqanngitsutut Allattoqarfiup nalilerpagu. Taamaalilluni periuseq ukiorpassuarni pioreersoq malittarisassiuunneqarpoq.

§ 16-imut

Aalajangersakkap qaqugu sinniisup aggersagaalluni sinniisuunerata naanissaa erseqqissarpaa, tamanna ingammik Inatsisartunut ilaasortatut atuuffimmi aningaasarsiaqartitaanerup il.il uninnissaanut pingaaruteqarpoq.